


易書詩




			五二一〇	漢書門
一〇	五〇	五〇	一〇	類
冊	架	函	號	

五二一〇	漢書
一〇	冊架
五〇	函號
一〇	冊架

內閣文庫	
番號	漢 5210
冊數	10(1)
函號	297 73

目錄二

297-73



浙江採集遺
書總錄

浙江
總集
書

乾隆三十七年正月初四

日內閣奉文庫

上諭朕稽古右文聿資治理幾餘典學日有孜孜因
思策府縹緲載籍極博其鉅者羽翼經訓垂範方
來固足稱千秋法鑒卽在識小之徒專門撰述細
及名物象數兼綜條貫各自成家亦莫不有所發
明可爲游藝養心之一助是以御極之初卽詔中
外搜訪遺書並命儒臣校勘十三經二十一史徧
布黉宮嘉惠後學復開館修纂綱目三編通鑑輯
覽及三通諸書凡藝林承學之士所當戶誦家絃
者旣以蒼萃畧備第念讀書固在得其要領而多

識前言往行以畜其德惟蒐羅益廣則研討愈精如康熙年間所修圖書集成全部兼收並錄極方策之大觀引用諸編率屬因類取裁勢不能悉載全文使閱者沿流溯源一一徵其來處今內府藏書插架不爲不富然古今來著作之手無慮千百家或逸在名山未登柱史正宜及時採集彙送京師以彰千古同文之盛其令直省督撫會同學政等通飭所屬加意購訪除坊肆所售舉業時文及民間無用之族譜尺牘屏幃壽言等類又其人本無實學不過嫁名馳騫編刻酬倡詩文瑣碎無當

者均毋庸採取外其歷代流傳舊書內有闡明性學治法關係世道人心者自當首先購覓至若發揮傳註攷覈典章旁暨九流百家之言有裨實用者亦應備爲甄擇又如歷代名人泊本朝士林宿望向有詩文專集及近時沉潛經史原本風雅如顧棟高陳祖范任啟運沈德潛輩亦各著成編並非勦說卮言可比均應概行查明在坊肆者或量爲給價家藏者或官爲裝印其有未經鐫刊祇係抄本存留者不妨繕錄副本仍將原書給還並嚴飭所屬一切善爲經理毋使吏胥藉端滋擾但各

省蒐輯之書卷帙必多若不加之鑑別悉令呈送
煩複皆所不免著該督撫等先將各書叙列目錄
注明某朝某人所著書中要指何在簡明開載具
摺奏聞候彙齊後令廷臣校覈有堪備閱者再開
單行知取進庶幾副在石渠用儲乙覽從此四庫
七畧益昭美備稱朕意焉欽此

乾隆三十八年閏三月初一日內閣奉

上諭前經降旨令各督撫等訪求遺書彙登冊府近
允廷臣所議以翰林院舊藏永樂大典詳加別擇
校勘其世不經見之書多至三四百種將擇其醇
備者付梓流傳餘亦錄存彙輯與各省所採及武
英殿所有官刻諸書統按經史子集編定目錄爲
四庫全書俾古今圖籍薈萃無遺永昭藝林盛軌
乃各省奏到書單寥寥無幾且不過近人解經論
學詩文私集數種聊以塞白其實係唐宋以來名
家著作或舊版僅存或副稿畧具卓然可傳者竟

不概見當此文治光昭之日名山藏弄何可使之
隱而弗彰此必督撫等視爲具文地方官亦第奉
以故習所謂上以實求下以名應殊非體朕殷殷
諮訪之意且此事並非難辦尚爾率畧若此其他
尚可問乎况初次降旨時惟恐有司辦理不善藉
端擾累曾諭令凡民間所有藏書無論刻本寫本
皆官爲借抄仍將原本給還揆之事理人情並無
阻碍何觀望不前一至於此必係督撫等因遺編
著述非出一人疑其中或有違背忌諱字面恐涉
手干碍預存寧畧毋濫之見藏書家因而窺其意

指一切秘而不宣甚無謂也文人著書立說各抒
所長或傳聞互異或紀載失實固所不免果其畧
有可觀原不妨兼收並蓄卽或字義觸碍如南北
史之互相抵毀此乃前人偏見與進時無涉又何
必過於畏首畏尾耶朕辦事光明正大可以共信
於天下豈有下詔訪求遺籍預於書中尋摘瑕疵
罪及收藏之人乎若此番明切宣諭後仍似從前
疑畏不肯將所藏書名開報聽地方官購借將來
或別有破露違碍之處則是其有人有意隱匿收存
其取戾轉不小矣且江浙諸大省著名藏書之家

指不勝屈卽或其家散佚仍不過轉落人手聞之
蕪湖間書賈書船皆能知其底裏更無難於物色
督撫等果實力訪覓何遽終湮惟當嚴飭地方官
勿假手吏胥藉名滋擾衆人自無不踴躍樂從卽
有收藏吝惜之人泥於借書一癡俗說在友朋則
然今明旨徵求借後仍還故物於彼毫無所損又
豈可獨抱秘文不欲公之同好乎再各省聚書最
富者原不盡皆本地人之撰著祇論其書有可採
更不必計及非其地產則搜緝之途更寬方不致
多有遺逸著再傳諭各督撫等予以半年之限卽

遵朕旨實力速爲妥辦俟得有若干部卽陸續奏
報不必先行檢閱若再似從前之因循搪塞惟該
督撫是問將此一併通諭中外知之欽此

乾隆三十八年五月二十五日內閣奉

上諭前經降旨博訪遺編彙爲四庫全書用昭石渠
美備並以嘉惠藝林旋據江浙督撫及兩淮鹽政
等奏到購求呈送之書已不下四五千種並有稱
藏書家愿將所有舊書呈獻者固屬踴躍奉公尚
未能深喻朕意方今文治光昭典籍大備恐名山
石室儲蓄尚多用是廣爲蒐羅俾無遺佚冀以闡
微補闕所有進到各書並交總裁等同永樂大典
內現有各種詳加核勘分別刊抄擇其中罕見之
書有益於世道人心壽之梨棗以廣流傳餘則選

一
派謄錄彙繕成編陳之冊府其有俚淺訛謬者止
存書名彙入總目以彰右文之盛此採輯四庫全
書本旨也今外省進到之書大小短長參差不一
既無當於編列縹緗而業已或刻或抄其原書又
何必復留內府且伊等將珍藏善本應詔彙交深
可嘉尚若因此收存不發轉使耽書明理之人不
得保其世守於理未爲公允朕豈肯爲之所有各
家進到之書俟核辦完竣之日仍行給還原獻之
家但現在各省所進書籍已屬不少向後自必陸
續加多其如何分別標記俾還本人不致混淆遺

失之處著該總裁等妥議具奏仍將此通諭知之
欽此

浙江採集遺書總錄目

甲集 經部

易類

書類

詩類

乙集 經部

周禮類

儀禮類

禮記類

通禮類

春秋類

丙集 經部

論語類 附逸語

孝經類

孟子類

四書類

羣經類

樂類

爾雅類

小學類

六書類

丁集 史部

通史類

編年類

別史類

霸史類

雜史類

掌故類 一 總類

掌故類 二 職官

掌故類 三 食貨

掌故類四 儀制

掌故類五 兵刑

掌故類六 河渠

掌故類七 水利

掌故類八 營造

戊集 史部

傳記類一 總類

傳記類二 以時代為次

傳記類三 以地為次

地理類一 通志

地理類二 各直省

地理類三 山川 名勝 古跡

地理類四 異域

史鈔類

史學類

譜系類

已集 子部

儒家類

雜家類

說家類一 總類

庚集 子部

說家類二 文格詩話

說家類三 金石書畫

說家類四 小說

菀玩類

類事類

叢書類

天文術筭類

五行類

兵家類

農家類

醫家類

釋家類

道家類

辛集 集部

總集類一 以時代為次

總集類二 以地為次

楚辭類

別集類一 唐

于集 集部

別集類二 宋

別集類三 宋

別集類四 金 元

癸集上 集部

別集類五 明

別集類六 明

癸集下 集部

別集類七 明

別集類八 國朝

閩集 編次照前例不列細目
副刻

乾隆三十九年五月十四日內閣奉

上諭國家當文治修明之會所有古今載籍宜及時蒐羅大備以光策府而裨藝林因降旨命各督撫加意採訪彙上于朝旋據各省陸續奏進而江浙兩省藏書家呈獻者種數尤多廷臣中亦有紛紛奏進者因命詞臣分別校勘應刊應錄以廣流傳其進書百種以上者並命擇其中精醇之本進呈乙覽朕幾餘親為評詠題識簡端復命將進到各書于篇首用翰林院印並加鈐記載明年月姓名于面頁俟將來辦竣後仍給還各本家自行收藏

其已經題詠諸本並令書館先行錄副將原書發還俾收藏之人益增榮幸今闕進到各家書目其最多者如浙江之鮑士恭范懋柱汪啟淑兩淮之馬裕四家爲數至五六七種皆其累世弄藏子孫克守其業甚可嘉尚因思內府所有古今圖書集成爲書城鉅觀人間罕覩此等世守陳編之家宜俾專藏勿失以補留貽鮑士恭范懋柱汪啟淑馬裕四家著賞古今圖書集成各一部以爲好古之勸又如進書一百種以上之江蘓周厚堉蔣曾瑩浙江吳玉墀孫仰曾汪汝璫及朝紳中黃登賢

紀昀勵守謙汪如藻等亦俱藏書舊家並著每人賞給內府初印之佩文韻府各一部俾亦珍爲世守以示嘉獎以上應賞之書其外省各家著該督撫鹽政派員赴武英殿領回分給其在京各員卽令其親赴武英殿祇領仍將此通諭知之欽此

乾隆壬辰之歲

天子緝熙典學發

明詔下各直省徵訪遺書於是浙前撫臣富勒渾署
撫臣熊學鵬今撫臣三寶會同學臣王杰暨臣
王宜望奉

命懋恭設法開局移諸監司郡守各諭所部徵書上

送延致在籍侍講臣沈初總其事遴取教官之

有學識黃瑋張羲年朱休度范鐸等日夕分校

其中隨所得叙日以進繼以故家之長篇鉅牘
山林之偏見僻論懼有所觸忤懷阻而弗克殫

也用厯

聖懷屢降

溫旨而縉紳士尤踴躍爭先善本四出浙中藏書之家夙所著稱首鄞縣范氏天一閣至今猶克世守餘若越中祁氏鈕氏禾中項氏朱氏曹氏錢塘趙氏其間不無輾轉剖散而流落人手尚多可稽近當

文治久長好學嗜古之士輩出若杭城之吳玉堦鮑士恭汪啟淑汪汝璉孫仰曾慈谿鄭大節續皆儲貯篇籍頗有可觀凡是諸家欣值

表章盛際鼓舞奮興各願整比所藏稽首上獻卽寒俊士一編一冊或有世不習見亦不敢抱為秘文挾策而至者源源不絕措頓列室常充物乎其間校閱諸員日益淬厲乃心黽勉求稱盛意薈萃檢理除還複重一一條其篇目據其指意

自壬辰秋訖甲午之夏作十二次綜錄

奏進統計之凡為書四千五百二十三種為卷凡五萬六千九百五十五不分卷者二千九十二冊一方之書浩穰若是將合天下而譔次之盛美可想見矣臣備位浙藩獲與董督之末親見夫

獻納輸送之勤未嘗不嘆古人之遣人搜括爲未善經理也事旣竣僚屬謀以所條目錄謹遵四庫成例略爲次序刊刻以備浙中掌故臣竊唯蒐得故書徃徃爲臣等所未經見祇奉明訓不復先行檢別其中文義純駁流傳真僞刊寫訛正應不免于參差且僅以一省所採雖不拘計地產而究屬一偏之藏未能通徧外臺中秘翰墨成林斤斤焉詔爲異本欲藉以展芹曝之忱者又未必非策府所先備他時九有畢彙編摩自鴻碩廷臣之手呈斷

宸衷勒成一代鉅典所謂昭鴻運垂休光者方于是乎在而此特瑣細者耳然天聲和于上而大地之一水一木悉應于下風動之休不嫌于推廣也况

國家良法美政凡直省所經奉行大小悉具簿錄登載俾後來有可考豈于稽古右文大典而不爲垂示乎爰據各教官類次之本謹加釐正捐貲以付諸梓

乾隆三十九年歲次甲午四月上浣日浙江布政使司布政使加三級臣王亶望謹序

浙江採集遺書總錄
 凡例
 一 欽奉
 諭旨徵訪遺書自無取乎習見茲錄所採雖不盡幽
 僻但凡
 頒立學官暨
 勅撰諸書并
 內府刊播以及海內流傳盛行之本概弗敢登唯上
 之有裨于經世下之有切日用其書一時未見
 流傳卽不拘時代遠近亦不拘本省外省亟甄

浙江採集遺書總錄

凡例

一 欽奉

諭旨徵訪遺書自無取乎習見茲錄所採雖不盡幽

僻但凡

頒立學官暨

勅撰諸書并

內府刊播以及海內流傳盛行之本概弗敢登唯上

之有裨于經世下之有切日用其書一時未見

流傳卽不拘時代遠近亦不拘本省外省亟甄

錄之以副闡揚之意

一宋元以來名人所著經解如已收入徐氏通志堂經解中則不復採惟遇舊刻舊抄流傳在徐氏未刻之前則登一二此外坊間所行巨帙如何氏之漢魏叢書陶氏之說郛毛氏之津逮秘書諸編所收種日甚夥但諸編所刻頗有刪本缺本不盡古書面目遇舊刻舊抄查與諸編有詳畧多寡之殊亦仍錄之以資檢較

一浙省儲書之家前代甬上范氏天一閣禾中項氏天籟閣越中鈕氏世學樓祁氏澹生堂

國朝曹氏倦圃朱氏曝書亭趙氏小山堂其著也然故家不幾時易至失墜而輾轉流傳遑遑多所湮滅此數家者惟天一閣歸然獨存古香一瓣不乏繼起之人近時杭城五家鮑氏知不足齋吳氏瓶花齋汪氏飛鴻堂汪氏振綺堂孫氏壽松堂慈水鄭氏二老閣購弄頗不寂寞恭逢聖世石文各家不惜秘本踴躍呈獻因嘉予其意並請入

告此亦儲書家不易邁之榮也茲錄如前列數家于書名卷帙下遇有希罕之本別載某氏所藏

刊本抄本或宋刊本元刊本影宋抄本其餘各
屬購辦紳士零星所繳者亦間著之以見古書
流傳有自並不沒其寔云

一歷次

進書祇遵

諭旨每書詳其卷帙爵里并摘叙著述大指茲錄檢
校原書如序文跋語可以畧見書之梗概并其
書之刊刻歲月久近亦誌之與原

奏書所列清單有詳畧互異之處蓋原

奏書清單務在簡明弗事旁及對駁之體宜然茲錄

所著以古書不易獲觀因考其制作原委總蘄
于顯出是書面日使好古者有述弗敢蹈率畧
之譏

一前代簿錄之學如七錄七志七畧類皆標題彙
次惟唐人之四部爲不可易茲錄大綱亦分四
部而綱之中有目條分頗細則參用列代正史
藝文志及馬氏通考晁氏讀書志陳氏書錄解
題各書博考而慎取者使學者繹其書名按其
部位而大指已瞭然心目矣

一茲錄所採各書祇遵

諭旨隨到隨辦其時校閱俱屬分手間有疎畧牴牾
旋即據原書或叅証他書一一改正然寔有因
原書已經裝潢解送無從核對又不便時日久
稽以資考索只得約畧仍舊以存闕疑之意

一歷次

奏書各種摘叙書中大旨唯別集祇著爵里卷表以
各種俱有體例可詳別集則詩文雜著而已茲
錄畧爲綴其出處本末暨前賢詩文評隲間蒐
采之以便觀覽非必謂知人論世也但別集諸
人多見于列代正史各書固無俟繁稱亦有其

集稍僻其人尚未經表見者仍倣晁志陳錄之
例只存爵里卷表不敢強爲之說云

一歷次

奏書隨時陸續採集以所得之先後爲次其中固多
流傳希罕之書而或外間坊肆雖不甚行其所
蘊亦無甚發明者亦兼收之總之意在博綜上
裨

朝廷購訪至意以備 館上之採擇匪先存一決
擇維嚴之見自一次至十次分甲至癸爲十集
十一次十二次所得較後亦補編之爲閏集焉

浙江採集遺書總錄

纂錄職名

大總裁

太子太保兵部尚書都察院右都御史總督閩浙提督軍務糧餉加三級 臣 鐘 音

兵部尚書都察院右都御史四總督前浙巡撫提督軍務糧餉兼該海防加級 臣 富勒渾

兵部侍郎都察院右副都御史巡撫廣西浙巡撫提督軍務糧餉兼該海防加級 臣 熊學鵬

兵部侍郎都察院右副都御史巡撫浙江提督軍務糧餉兼該海防世管佐領加級 臣 三 寶

提督浙江學政內閣學士兼禮部侍郎加三級 臣 王 杰

提調

浙江布政使 司布政使加三級 臣 王直望

浙江布政使司布政使加三級臣郝碩

署理浙江布政使司按察使兼鹽驛水利道加三級臣徐恕

署理浙江按察使司分巡杭嘉湖兵備道兼海防加三級臣孔毓文

督理浙江通省糧儲漕務道加三級臣李慶棻

分巡寧紹台海防兵備道監收浙江海關稅務加三級臣馮廷丞

分巡溫處兵備道兼管水利加三級臣楊謹

分巡金衢嚴兵備道加三級臣王勳

監理

原任浙江杭州府知府加三級臣彭永年

浙江杭州府知府加三級臣噶爾弼善

原署浙江杭州府知府嘉興府海防同知加三級臣舒希忠

總裁

內廷供奉日講官起居注翰林院侍講臣沈初

總校

杭州府於潛縣訓導乙酉選貢生臣張義年

嘉興府嘉善縣訓導丙子科舉人臣黃璋

紹興府嵊縣訓導癸酉科舉人臣朱休度

分校

杭州府錢塘縣教諭丁卯科舉人臣范鐸

杭州府錢塘縣訓導甲子科舉人臣吳宗玠

台州府天台縣教諭癸酉科選貢生	嚴州府壽昌縣訓導乙酉科選貢生	處州府景寧縣訓導壬申科舉人	侯選教諭壬午科舉人	辛卯科舉人	辛卯科舉人	杭州府仁和縣生員	紹興府學廩生	杭州府錢塘縣副貢生
臣陳文豹	臣翟方震	臣任濤	臣俞派	臣陶廷珍	臣孫麗天	臣朱文藻	臣唐虞	臣吳桓武

繕錄

杭州府錢塘縣學生	杭州府餘杭縣學廩生	杭州府錢塘縣學生	杭州府學廩生	杭州府學廩生	杭州府學廩生	杭州府錢塘縣學生	杭州府錢塘縣學生	杭州府錢塘縣學生	杭州府錢塘縣學生	杭州府錢塘縣學生
臣盧登俊	臣俞廷楡	臣吳純	臣李蓮	臣汪日葵	臣關槐	臣唐瀛洲	臣陳玠	臣周廷模	臣顧雨宜	

杭州府學廩生臣湯誥

杭州府學生員臣洪學賢

寧波府鄞縣學生員臣范源沛

紹興府餘姚縣生員臣黃徵肅

紹興府餘姚縣生員臣黃徵父

浙江採集遺書總錄

甲集

易類

周易注一卷寫本

右吳欝林太守吳郡陸績撰按隋志作十五卷釋文序錄及新舊唐書俱作十三卷會通一卷朱彛尊曰陸氏注已亡今鹽邑志林載有一卷乃係抄撮陸氏釋文李氏集解二書為之

周易元包五卷一名元命包刊本

右後周衛元嵩撰唐秘書監武功蘇源明傳國子

監助教趙郡李江注所言皆近茲緯晁公武讀書志以元嵩作唐人屬誤

周易舉正三卷 刊本

右唐蘄州司戶叅軍郭京撰京自謂家藏王弼韓康伯手札周易本及石經比校今所集者正訛凡一百三十五處二百七十三字晁志云蓋以繇象相證有闕漏處可推而知託言得之王韓耳

周易口義十卷 刊本

右宋太常博士泰州胡瑗撰或云其門人倪天隱所纂按宋藝文志別有胡瑗易解十二卷與此並

載李振裕謂卽天隱所述口義辨其本無二書說見經義考

東坡易傳九卷 刊本

右宋學士眉山蘇軾撰自言其學出於老泉

了齋易說一卷 山陰祁氏澹生堂寫本

右宋贈諫議大夫延平陳瓘撰止解六十四卦不及爻傳瓘子正同紹興十二年知常州曾刊於官舍有跋

吳園先生易解九卷序論五卷雜說泰論各一篇 澹生堂寫本序論內有闕文

右宋朝散大夫德興張根撰引事證經每節止一
二語而義甚灑括根為忠定公燾之父此後序乃
燾子垓作

周易講義十卷

宋志作解義

寫本間有關文

右宋資政殿大學士開封耿南仲撰其說詳於事
理晁公武云紹聖間場屋行之

郭氏傳家易說十一卷

澹生堂寫本

右宋處士河南郭雍撰此書經義考云已闕惟大
易粹言所載者存今本首尾完足蓋宋氏所未見
也雍自序言其父忠孝受業伊川先生二十餘年

因述舊聞以傳於家後有隆興甲申曾伋跋○按
史稱雍先世洛陽人隱居陝州長楊山今序尾自
署河南本祖貫云

周易元包數總義二卷

刊本

皇極通變

原四十卷今止存四冊不分卷

寫本

右宋成都路鈐轄司臨邛張行成撰行成有進書
狀云臣杜門十年著成述衍十八卷以明伏羲文
王孔子之易翼元十二卷以明楊雄之易元包數
總義二卷以明衛元嵩之易潛虛衍義十六卷以
明司馬光之易皇極經世索隱二卷觀物外篇衍

義九卷以明邵雍之易通變四十卷取自陳搏至邵雍先天卦數等十四圖敷衍解釋以通諸易之變始若殊塗終歸一致上件七種謹隨狀進今所傳乃七種之二

慈湖易解二十卷

經義考作十卷

刊本

右宋寶謨閣學士慈谿楊簡撰簡本象山高弟故解易專尚心悟

周易經傳集解三十六卷

秀水曹氏倦圃寫本

右宋知潭州福清林栗撰淳熙十二年表進付秘書省有勅褒美勅文及表與貼黃俱載卷首其書

旨詳馬端臨經籍考此編向少流傳近崑山徐氏業已開雕或以栗嘗與朱子為難因毀其板論者惜之

南軒易說

原十一卷今止存三冊不分卷

倦圃寫本

右宋侍講廣漢張栻撰此編宋史及文獻通考俱不載朱氏經義考亦云未見今本雖僅存繫辭以下而書以人重彌足珍也後跋云廉使東泉王氏傳授正本贛州路總管府知事吳將仕樟董刊古易占二卷

寫本

右宋德興丞睢陽程迥撰自序云嘗聞邵康節以

易數示吾家伯淳伯淳曰此加一倍法也其說不
詳見於世今本之繫辭說卦發明倍法用逆數以
尚占知來以補先儒之缺庶幾象數之學可與士
夫共之不爲纖緯瞽史所惑

誠齋易傳二十卷 刊本

右宋寶謨閣學士廬陵楊萬里撰嘉熙元年奉旨
給劄其家抄錄宣付秘閣董真卿曰其說本之程
氏而多引史傳事以證之

東萊易說二卷 寫本

右宋著作郎金華呂祖謙撰皆平時講說所及而

門人記錄之者

繫辭精義二卷 寫本

右前人撰以程傳不及繫辭乃集程子以下諸家
說陰以補之陳振孫書錄解題云

周易卦爻經傳上下篇訓解二卷 寫本

右宋建安蔡淵撰依訓詁逐字分晰按此書經義
考云四卷存三卷今本止上下篇各一卷釋其題
名又似繫辭以下原未嘗釋者又朱氏錄有九峯
後序今本無之而此有開禧乙丑自序爲朱氏所
不錄意傳本或有異同耳

周易總義二十卷 寫本

右宋著作郎寧鄉易祓撰畧訓詁而明大義每卦總爲一說標於卦首胡一桂云紹定間祓侍經筵日嘗以是編陪講

西溪易說十二卷 寫本中有闕文

右宋興化李過撰馮氏椅謂其多所發明第於上下經及十翼次第輒以意爲移掇未免爲後儒所議

周易要義十卷 鄞縣范氏天一閣寫本

右宋僉書樞密院事邛州魏了翁纂按了翁各經

要義共有九種方回謂係謫靖州時取諸經註疏摘而成者惜流傳頗少今所見尚書儀禮并此已得其三又按魏公別有周易集義六十四卷乃集周邵程朱以下十七家之說與此爲二書朱氏經義考錄彼遺此蓋失載云

易通六卷 寫本

右宋資政殿學士長樂趙以夫撰自序云叅稽卦爻往來俱通如是而亨貞如是而悔吝如是而吉凶无咎若象若數理無不合故名曰通其書有莆田黃績相與叅定

易序叢書十卷

華亭董其昌家寫本

右宋宗室趙汝楳撰分十種曰易雅曰筮宗曰八陳通記曰通記衍義曰通記拾遺曰如意城圖畧曰如意城畫地曰六日七分論曰辨方圖曰納甲辨首詳訓詁次明著策自三卷以下皆旁採握竒遁甲之說而申之有寶祐丁巳福荀中序

淙山讀周易記十卷

秀水朱氏曝書亭寫本

右宋方實孫撰有自作前後序前序大旨謂易之為書言道則象數在其中後序論重卦及卦名卦辭象象爻象并用九用六之義例極詳凡二千五

百餘言

方舟先生易學二卷

寫本

右書分五體例一卷象統一卷不著撰人姓氏朱彝尊疑為宋李石作說詳經義考

大衍索隱

原三卷今存二卷

慈谿鄭氏二老閣寫本

右宋太府寺簿丁易東撰存者上卷原衍中卷翼衍皆自為圖說其下卷稽衍乃萃五十七家之說而推廣之者今闕

讀易考原一冊

經義考作三卷

曝書亭寫本

右豫章蕭漢中撰漢中論卦序之義謂必先分而

後序其說爲從古儒先所未發書成於泰定年間
至明朱升表而出之始廣其傳首有楊荆南序末
一篇題曰蕭楊合易

周易折衷二十三卷 倦圃寫本

右元潼川趙采撰自序云是集以程朱傳義爲主
而附以鄙見間亦竊取先儒象數變互以資發明

周易集傳 原十八卷今存前八卷 寫本

右元湖廣儒學提舉永新龍仁夫撰大旨主本義
而間出新解以雜卦傳爲古筮書如春秋傳所引
屯固比入坤安震殺皆以一字斷卦義孔子存此

類以爲經羽翼初非創作其說未經人道

大易法象通贊七卷 寫本

右元學士處州鄭滁孫撰滁孫先有中天述考一
書於歸田後重加研訂著此編以闡先天後天圖
義

周易衍義七冊 黃氏千頃堂書目作八卷 寫本

右元南康教授南昌胡震撰自序謂本平日父師
之訓筆之成書附以程朱張楊諸賢之說

周易原旨六卷易源奧義一卷 寫本

右元黃州路總管保八撰其書會上東宮又總名

曰易體用說理多醇不為奇詭語

周易爻變易蘊四卷

寫本

右元天台陳應潤撰黃潛序云陳澤雲所注乾坤二卦已無餘蘊至於變爻三百八十有四旁通他卦之義爻爻有發揮事事有考證又如刪正太極八卦爻法逆順等圖探頤索隱非灼然有見乎聖人之心者不能也

周易圖說二卷

曝書亭寫本

右元進士吳興錢義方撰上卷本旨圖七下卷後天演義圖二十各系以說專論河圖不及洛書

易筮通變三卷

天一閣寫本

右元臨川道士雷思齊撰凡五篇一卜筮二之卦三九六四衍數五命箸

周易旁註十卷前圖一卷

刊本

右明侍講學士休寧朱升撰張雲章曰朱楓林嘗自言旁注之作知其籛者以為小學訓詁之入門悟其妙者知為研精造道之要法至姚文蔚以其書易古本為今本易旁行為直下目之日會通取便於讀而無所增損然非作書本意矣

周易叅義十二卷

寫本

右明訓導新喻梁寅撰自序云程子明理朱子推象非故爲異也其詳畧相因精粗相貫固待學者之自得寅竊叅酌二家旁採諸說僭附已意別爲一書欲觀者由詳而造約考異而知同

大易鉤元三卷 寫本

右明文華殿大學士崇德鮑恂撰首卷論易之原中卷論讀易法末卷論卦爻義例各條舉一二十則本名學易舉隅寧王權更其名序而梓之

呆齋周易圖釋三卷 天一閣寫本

右明禮部尚書永新劉定之撰自序云先儒言易

如燭籠添一條骨子則障一路明蓋著不得詳說也故予于圖括其總於釋舉其畧而已今圖已佚釋三卷嘉靖中王三省得而序之因以傳此書經義考云未見

玩易意見二卷 寫本

右明吏部尚書三原王恕撰張雲章口王公爲學老而彌篤是書成時年已九十有一矣意在匡弼程朱而未免師心立說讀者詳擇焉可也

周易說翼三卷 刊本

右明禮部侍郎高陵呂柟撰王九思曰涇野公著

述甚盛若周易說翼毛詩說序春秋說志禮問內
外篇四書因問宋四子抄釋足以發前聖之奧旨
正後賢之偏識指來學之迷途按諸書皆與門人
問答之語今自說翼以下五種俱著於錄

易經大旨四卷 刊本

右明吏部尚書蘭谿唐龍撰龍於提學關中時著
此以示三秦士蓋卽舉子業格而發之乎性命者
也

易學本原啟蒙意見四卷 刊本

右明兵部尚書朝邑韓邦奇撰體例本朱子啟蒙

而增釋頗詳

易占經緯四卷 刊本

右前人撰其說以三百八十四變爲經四千九十
六變爲緯經者易爻辭緯取易林附之占則一以
孔子占變爲主乃韓之門人王賜綬張士榮受其
語次第編成者

讀易索隱六卷 刊本

右明國子監助教壽昌洪鶴撰經義考云未見今
觀其書雖名索隱其旨實顯非有幽深之解

古易考原三卷 寫本

右明鹽課司提舉旌德梅鶯撰謂連山歸藏周易皆本伏羲故爲此以考其原欲使讀易者知三易之有本其諸家說或謂伏羲止有八卦文王重爲六十四卦或謂伏羲止立三畫之名文王始立重卦之名者槩無取焉

周易贊義六卷繫辭上傳一卷 以下闕 刊本

右明南京光祿寺卿三原馬理撰朱睦㮮序云國朝易學余所知者臨江梁石門氏義晉江蔡虛齋氏蒙引陳紫峯氏通典增城湛甘泉氏易測南海方西樵氏翼說高陵呂涇野氏說安陽崔少石氏餘言七先生

所著咸推明性理以與前儒相統承谿田此書發凡舉例闡微摘隱博求諸儒同異得十餘萬言猗歟盛哉當與七先生易並行矣。按原序作十七卷與此相懸或刻時併之耳

易學四同八卷 刊本

右明長沙知府山陰季本撰自序云易者心學也隨時變易歸於中道故謂之易曰四同者言羲文周孔四聖人同此心卽同此理初無異學云

圖文餘辨二卷 刊本

右前人撰分內外篇自序謂以本義之九圖爲主

他圖有相發明者亦附見焉義係於九圖者爲內
篇不係於九圖而自成一家者爲外篇各辨其下
著法別傳二卷 刊本

右前人撰以朱子啟蒙仍有郭雍舊說未盡聖人
彰往察來之用因著論列圖別爲二篇序云凡發
明著法本旨者定爲占辨占例占戒占斷合卜筮
論爲內篇若象占取應於易辭之中物類增分於
易象之外及以己意斷占有驗而非出於易理之
自然者並列外篇以備推測之一術。以上二種
總名易學四同別錄與前書統爲一編後有其子

丑跋

易象解四卷

澹生堂藏刊本

右明御史南宮劉濂撰前有原象圖說一卷所言
多涉象數經義考云未見

易圖識漏一卷

天一閣寫本

右明海陽儒學訓導黃芹撰列圖二十有七各系
以儒先之說并加案焉卷首有蔡清林魁往復書
周易不我解 原六卷今存一卷 二老閣藏刊本

右明進士長淮衛徐體乾撰黃百家曰徐行健易
學自言本陳希夷趙青山用天星配四時謂法象

莫大乎天地變通莫大乎四時卦爻不合天文不
配四時則孔子繫辭皆無著落其說具有神解是
編流傳者寡余家止存乾坤一卷後五卷訪之不
得今本卽百家所藏歸於慈谿鄭氏者

補齋口授易說三卷

寫本

右永豐周佐編次其師之說專論乾坤二卦及上
下繫辭之義所云補齋未詳姓氏朱夔尊亦云未
見但以其載在聚樂堂書目定爲正嘉以前人說
詳經義考

周易義叢十六卷

刊本

右明刑部郎中太平葉良佩輯取漢魏以下百家
之說摘錄其要仍冠以本義備載程傳而以已說
別爲測語附綴焉

易辨一卷

二老閣寫本

右明禮部主事勤縣豐坊撰坊經學多作僞前人
辨之詳矣此書分六篇其謂孔子授易於商瞿如
文言傳所云何謂也是瞿所問所云子曰是夫子
答之之詞此說頗新

易修墨守一卷

刊本

右明刑部主事歸安唐樞撰論易大義凡十四篇

其門人王思宗序云易修墨守者何詔學易者之
力於修也

周易辨錄四卷 刊本

右明贈大理丞富平楊爵撰爵爲御史時以言事
被繫於憂患中作此因取困德之辨也之義以名
其書

易象大旨八卷 刊本

右明江西按察副使江陰薛甲撰張袞序云象者
謂易所自有非有加也大旨者謂括諸說讚以微
言止以明象而已此薛君命名意也

周易象旨決錄七卷 刊本

右明富順熊過撰廣証羣書以推象數楊慎稱其
引伸觸類繼絕表微可謂擇之精而語之詳

胡子易演十八卷 寫本

右明廬陵胡經撰其說多與朱子異

周易中說四十四卷 刊本

右明兗州府推官潁川盧翰撰列說頗詳多證史
事每於經傳中隨處著圖系于本節以演其義原
名古易中說依朱子定本次第其子晉改從今本
刻之昧初旨矣

籤易一冊

刊本

右前人撰以太極兩儀四象八卦六十四卦各為一籤共分七十九籤自為贊語以代卜筮張鶴鳴謂其學體在中說用在籤易

易象鈎解四卷

寫本

右明應城陳士元撰自序云往余為彙解三卷括其大凡而舊所謬承尚闕質問者茲述之蔣端題曰鈎解者鈎曲也轉取也本無所見物而旁通者也

周易傳義補疑十二卷

刊本

右明禮部尚書丹陽姜寶撰以程傳朱義為主間有疑者未詳者則取他說及己意補之

易解十冊

崑山徐氏傳是樓寫本

右明御史吳江顧曾唯撰其說多醇於理象無所偏主經義考載有曾唯周易詳蘊當即此書但彼作十三卷今本不分卷無繫辭以下

淮海易談四卷

刊本

右明南京工部尚書如臯孫應鰲撰自謂因傳以求經因經以求心而得之所言詳於人事

易經釋五卷

刊本

右明翰林院待詔肝江鄧元錫撰前列易圖其五
卷內解上下經者居二卷此外先天圖原後天圖
原一卷十翼通一卷反卦爲偶圖說一卷。按元
錫五經繹合刻而分編內惟說春秋一卷名通不
名繹俱見後

周易古今文全書二十一卷

刊本

右明吏部侍郎上饒楊時喬撰曰全書者論例二
卷以發其凡古文二卷取古本二經十翼篆書之
今文九卷取漢儒所分經傳楷書之易學啟蒙二
卷取朱子原本註釋之傳易考二卷取自漢以下

諸儒言各存之末附龜卜考一卷自謂於此三十
餘年稿凡數易尚未敢以自信

讀易紀聞六卷

刊本

右明太學生崑山張獻翼撰分卦分章而總釋之
雖取衆說而實貫以己意非仍其文也

讀易韻考六卷

刊本

右前人撰楊時喬云張幼于以一部易皆有韻每
舉漢唐宋史書及釋書詩賦等書叶韻諧韻以實
之謂句句皆韻或有強通者然易韻賴以傳矣

葉八白易傳十六卷

天一閣寫本

右明葉山撰山號八白爵里無考張雲章曰其言
出入子史殊多踳駁大要以楊誠齋爲宗

易臆三卷 刊本

右明錢塘鄭圭撰自云聖人之易詁意也後儒之
易詁詁也以詁詁詁之非易亦猶以臆臆意之非
易也予不良於詁而以臆其言蓋喜爲新闢之說
者經義考云未見

易學十二卷 刊本

右明大學士勤縣沈一貫撰乃當時進呈講義

易象管窺十五卷 刊本

右明諸生嘉興黃正憲撰多詮義理不及象占

大象觀二卷 澹生堂寫本

右明禮部主事安福劉元卿撰專釋大象其序依
雜卦傳爲先後始乾終夬經義考作大易觀屬誤

學易舉隅六卷 刊本

右明貢士長泰戴庭槐撰一卷解天地之易二三
卷解宓犧之易四卷解文王之易五卷解周公之
易六卷解孔子之易各附以圖。按以上二種經
義考俱云未見

周易象通八卷 刊本

右明宗室朱謀埠撰大旨據繫辭之言象者推行其義以解文周象爻曹學佺曰其道主變其說順乎本文而不為穿鑿

伏羲圖讚二卷

刊本

右明遊擊連江陳第撰第本學官弟子後以薦為武職尋棄去著書自喜此編為圖不用奇耦以黑白為陰陽而兩儀四象八卦皆規方而為圓蓋其學從禪門證入率由心得與諸儒異張雲章云

今易詮二十四卷

寫本

右明常州布衣鄧伯羔撰一遵呂東萊本自序云

詮擇言也古今說易何啻數百家何啻數萬言言人人殊所貴擇善而執合異而同其言蓋自信慎於取裁矣

羲經十一翼五卷

今書有闕

寫本

右明金谿傅文兆撰凡分五篇上古易一觀象篇二玩辭篇三觀變篇四觀占篇五其論主文王作爻辭之說謂與周公無涉而辨漢儒費直為亂易黃虞稷曰文兆以孔子傳易為十翼而已又翼孔子故謂之十一翼

易經疑問十二卷

刊本

右明新興知縣烏程姚舜牧撰善於紬繹經義而得其間如謂用九用六二用字不應作變剛變柔解謂幾者動之微幾字專言吉而不兼言凶此類皆足補前人所未逮

易經兒說四卷 刊本

右明廣西布政司叅政晉江蘓濬撰乃家塾授讀講義

周易勺解三卷 刊本

右明禮部尚書晉江林欲楫撰多自爲詮釋間亦引舊解而剖析之曰勺解者寓謙辭也

易會八卷 刊本

右明司經局洗馬安福鄒德溥撰觀象玩占就心所會者而述之故名

易象鈔上下經二卷卦圖繫辭附錄共四卷 刊本

右明御史武進錢一本撰其學深于象數先著有像象管見一書後十年隨讀隨抄積與前等復成此編

讀易述十七卷 刊本

右明尚寶司少卿婺源潘士藻撰焦竑曰易家言理莫備於房審權言象莫備於李鼎祚潘去華袁

而擇之補其不足表其未明以指來學可謂勤矣
易筌六卷 刊本

右明翰林院修撰上元焦竑撰自序云聖人微言
備載於易所謂窮理盡性至命之學也儒者習而
弗察三氏因駕其說而與儒角李觀嘗言無思無
為之義晦而心法勝積善積惡之誠泯而因果生
此編出學者知二氏所長乃易之所有而離倫絕
類不可為家國訓者則易之所無也

周易正解二十卷 刊本

右明戶科給事東京山郝敬撰謂執義者遺象狗

象者失意至緯釋亂正而易通旁驚故作此正之
○按郝氏尚有尚書辨解毛詩原解春秋直解禮
記通解儀禮節解周禮完解論語詳解孟子說解
總為九經解自序云通為卷一百六十五為解一
百六十七萬言

易領四卷 刊本

右前人撰每卦於彖爻前冠以序卦傳畧加敷衍
自謂如著衣者挈其領而前後襜如故名

周易旁注會通十四卷 刊本

右明太僕寺少卿錢塘姚文蔚撰即朱氏升之本

而移易之說見前

古易彙編十七卷 刊本

右明太僕少卿臨清李本固撰其序先二經後十

翼以復古本 惟改居室七條祐助一條何思十一條入文言傳 其體列三

大綱曰意辭曰象數曰變占意辭之目八曰古易

曰辭會曰明意曰釋名曰詳易曰玩辭曰誤異曰

易派象數之目八曰圖書象曰圖書數曰總論曰

畫象曰三易曰廣象曰觀象曰衍數變占之目十

曰著變曰之變曰反對曰變例曰小成曰觀變曰

不卜曰玩占曰卜筮曰斷法高出序稱其采輯漢

唐諸家頗衆秩乎有則確乎有據

易經通論十二卷 後附河圖各說 刊本

易經可說七卷 前有總論八篇 刊本

右明提學副使侯官曹學佺撰前書統論大義後書則按節分疏之皆採取舊說而以己意刪潤焉者

周易縣鏡十卷 寫本

右明高安喻有功撰廿士价序云首明太極河圖洛書之秘次陳意言象數之微又次闡先後天策軌之妙又次載歷代帝王經世甲子之序而未纂

左國繇象占驗并郭氏洞林附之學者得此用易如鑑照然謂之縣鏡不誣也

澹窩因指八卷 刊本

右明布政司叅議山陰張汝霖撰自序云余讀易龍山之澹窩偶繙圓覺經聞所謂因指見月也者乃灑然起曰聖人精蘊載在六經譬之猶月也後儒以訓詁解六經譬之猶指也余嘗解易遂以因指名之

周易古文鈔三冊 刊本

右明左都御史山陰劉宗周撰以乾卦尚存古文

之舊因推其例以更定各卦凡爲經二卷繫辭傳以下仍載後如舊別附易贊圖說二種其書爲門人黃宗炎姜堯校刊

周易宗義十二卷 刊本

右明袁州府知府婺源程汝繼輯朱之恭謂其羅列諸家之說句櫛字比必求融會貫通而後錄之故能叅舉所長

易義古象通八卷 刊本

右明右僉都御史松谿魏濬撰大旨謂天地間自然之易爲象無象不可以言易天地自然變易之

理爲通無通不可以言象因推其義而作此前有
明象論八篇

易芥八卷

刊本

右明舉人仁和陸振奇撰條說大義葛寅亮謂其
不執象亦不執理

易林疑說三冊

不分卷

刊本

右書稱楊瞿崧著按朱氏經義考有楊啟新易林
疑說二卷復有楊瞿崧易林疑說十卷但兩處俱
云字穉實晉江人俱引黃鳳翔之說其言曰同里
楊穉實著易林疑說采摭詳而考訂覈如謂九疇

子月脗合河圖則取諸胡方平謂洛書可以叙疇
亦可以畫卦則取諸陳器之皆非創已見爲臆說
者至於橫圖圓圖逆數順數與夫五行之推遷生
尅縱橫錯綜左右逢源尤超然言詮象數之表細
按今書正與黃說相符惟朱氏兩處所載微有不
同於啟新則云萬歷己卯舉人官左州知州於瞿
崧則云萬歷丁未進士歷官江西提學副使以意
度之楊氏當名啟新字穉實號瞿崧由己卯舉人
登丁未進士初官左州歷任提學本爲一人一書
朱氏偶岐載之耳書以俟考

易學五冊 刊本

右明兩淮運判仁和卓爾康撰多採象數家言

易窺十冊 經義考作六卷今不分 寫本

右明常熟程玉潤撰玉潤為伊川後裔是書即取程傳而推衍之一名周易演旨

周易揆十二卷 刊本

右明大學士嘉善錢士升撰子棻跋曰府君留心易學耄而彌篤此書因爻探象因象觀爻別二卦於一卦定主爻於六爻至於互體側體靡不該盡

周易會通十二卷 刊本

右明湖廣叅議長洲汪邦柱撰繆昌期序謂其櫛比羣義不徒為舉業階梯其書有休寧江枏相與叅定

像象述五卷 寫本

右明貢生無錫吳桂森撰述者述其師錢氏一本之說也錢有像象管見及像抄續抄三書桂森以其言不盡於書意不盡於言因取夙昔所講授者而復述焉

廣易筮二卷 刊本

右明平湖沈瑞鍾撰總論卦義及爻象大旨不詳

訓詁有來復爲之序

周易玩辭困學記八冊 刊本

右明舉人海寧張次仲撰序云大約根柢窮理而上下數百家無不折衷其辨變卦之說非某卦從某卦而來又辨困重之法八卦無自十六三十二以至六十四之說又謂希夷康節作方圓圖繪其所自得非易本有此圖又謂一卦六爻如主伯亞旅無此以爲君子彼以爲小人反背錯雜之理皆創獲於古人所未發者

易象正十四卷

三易洞璣十六卷

刊本

右明左諭德漳州黃道周撰二書言數其旨幽奧非淺學所能窺黃宗羲曰漳海之學尤遠於易歷三乘易卦爲二十六萬二千百四十四以授時配之交會閏積贏縮無不脗合

兒易內儀六卷外儀十五卷

刊本

右明戶部尚書上虞倪元璐撰亦圖數之學蔣震階曰公作兒易兒者姓也其義孩言童蒙也其目曰原始曰正定曰能事曰盡利曰曲成曰申命其學渾淪無端與漳浦黃公角立成家

雪園易義四卷 刊本

右明汝寧知府嘉善李奇玉撰曹勲序曰其觀象玩辭則一本乎說卦其觀變玩占則兼取乎中爻析如繭絲融於爐雪○按奇玉為高氏攀龍弟子故多本師說而推演之

卦變考畧二卷 刊本

右明舉人鄞縣董守諭撰專考諸家論卦變之說而折其同異經義考云未見

周易訂詁十六卷 刊本

右明禮部尚書漳州何楷撰其文遵古本十二篇

次第其說詳於訓詁自序一首論分經合傳之非古最為明晰

讀易蒐十二卷 刊本

右明福建按察使僉事鄭賡唐撰叅訂舊說以成文大要至於言理

易學疏四卷 刊本

右明衢州周一敬撰即本苑洛韓氏邦奇之易學約其文而詮疏之者故一名苑洛先生易學疏

易疏五卷 刊本

右明禮部主事新城黃端伯撰初端伯取卦變圖

叅之豁然有省夜夢靈龜伏胸臆間筮之得明夷
之卦始注京房易變之本於文王箕子於是旁叅
陰符鑿度握竒遁甲叅同諸書皆與京房易傳符
合因作此疏以推闡之自序云爾未知其信然否
十願齋易說一卷易箋一卷 刊本

右明桂林推官武進吳鍾巒撰易說統論卦德易
箋摘解爻義此二種經義考俱云未見

易經說意七卷

經義考作
易經大意

刊本

周易翼簡捷解十六卷

前有羣經輔易說并圖說義
例共一卷末附拾遺一卷

刊本

右明行人臨川陳際泰撰說意者順文敷說猶近
舉業家數至翼簡則抒所心得推究終始用意尤
深其論謂圖書兩物分而體用合河圖通天不能
離地洛書應地不能離天大禹祖之以作範非偏
則書而遺圖文周祖之以演易非偏則圖而遺書
蓋宗乎表裏經緯之說者

易序圖說二卷

刊本

右明監察御史無錫秦鏞撰鏞以孔子雜卦對待
之義求文王序卦流行之理因悟六十四卦陰陽
覆對次第配合俱有自然之妙乃演爲圖說上篇

分五節下篇分四節又附先後天諸圖各系以贊
嚴福孫稱其匪獨析理精於象數亦無不合

讀易畧記二冊 二老閣寫本

右明旌德縣知縣海寧朱朝瑛撰謂先儒言易詳
於所變而不詳於所未嘗變變者象也未嘗變者
太極也要惟求合於其變而未嘗變者乃能觀其
會通其自述作書大旨如此

讀易隅通二卷 刊本

右明兵部主事蕭山來集之嘗爲安慶推官是書
卽守安慶城時夜分不寐於巡邏之隙挑燈讀易

有得輒書因而成帙夫履虎涉川無非易義集之
當兵戈俶擾中從容經術卒能定變保城其於所
學洵無負矣

易圖親見一卷 刊本

右前人撰爲圖九十有二各系以說

田間易學六冊 刊本

右明桐城錢澂之撰追述其父口授易義而增輯
之於衆說中采蔡虛齋黃石齋何元子方密之之
說爲多

讀易緒言二卷 刊本

右明舉人嘉善錢棻撰激之序曰我家仲芳更歷
世變卓然於古今治亂之故其著易上以明陰陽
之消長下以審君子小人進退之幾而殷殷扶抑
之義情見乎詞

易十三傳三冊 曝書亭寫本

右有朱彝尊手跋云易十三傳未詳誰氏所作第
知爲嘉靖間人其云十三傳者乾上九傳一姤初
六傳二姤九二傳三姤九三傳四姤九四傳五姤
九五傳六姤上九傳七大過初六傳八大過九二
傳九大過九三傳十大過九四傳十一大過九五

傳十二大過上六傳十三證以歷代紀年蓋仿邵
氏經世書而於六十四卦相生圖則又不主邵氏
之說是編諸藏書家目錄無之康熙己卯八月既
望得之西湖書估舟中

周易古經一冊 寫本

右明建安雷樂撰歷攷經傳因草取漢費直鄭康
成魏王弼宋胡旦胡瑗呂大防邵子晁說之程迥
呂祖謙朱子各家之本列其篇次同異而較論之
仍以古本正文著於後此治易家所不可不知也
○按前此以下十五家明人易解查經義考及黃

氏千頃堂書目俱不載

周易古本一冊 刊本

右明無錫華兆登編亦但列篇次無解釋於文周
彖爻各分上下二篇於十翼移象傳於彖傳前改
小象傳爲爻傳併彖象繫辭各傳俱不分上下蓋
考據各本而仍以意定之者恐非漢志舊次也。
按二家所列古本於彖辭上無乾坤等字而但冠
以三三三三三等卦於爻辭上無初九初六等字而
但冠以二亦未知果有合於古否

周易古本一冊 刊本

右明禮部尚書武進孫慎行撰分列經傳釋爻變

大旨

續韋齋易義虛裁八卷 刊本

右明宮保尚書涂宗濬撰有潘王繼成子序謂讀
易者非虛無以妙神明之用而與無言合符非裁
無以定取舍之宜而俾衆說歸一故以命名續韋
齋者蓋其所居也

讀易識疑一冊 刊本

右明宗室朱睦㮮撰不句櫛字梳但取意所疑者
分條辨之

易象會旨二卷 刊本

右明陝西布政司理問臨川吳撫謙撰專明八卦
交易之義獨取孔子大象傳每二卦並列而總釋
之如乾則與坤並釋屯則與解並釋蓋震下坎上
為屯坎下震上為解也餘仿此

易學管見六冊 刊本

右明晉江洪啟初撰就已見而申說之間引舊解
僅三之一亦不主象數者

周易時義注四冊 刊本

右明貢生新安章佐聖撰詮解簡明所采宋儒之

說為多後附卦變諸圖

義畫憤叅十五卷 刊本

右明錢塘陸位時撰叅采眾解依經詮釋於圖書
表裏之義多有發明

周易說統十二卷 刊本

右明仁和張振淵輯大旨宗程朱傳義其他說有
與程朱互異及可以觸類旁通者兼採分附標為
四例曰附異曰附叅曰附別曰附餘

易憲四卷 刊本

右明刑部主事華亭沈泓撰有黃氏淳耀序此書

近年始刊雷鉉跋云不矜新奇不事泛濫足稱傳義之功臣

易學著貞四卷 刊本

右趙世對撰皆筮占之說本諸啟蒙爲多命曰著貞者變而歸於不變之道也自序云

易經小傳二十卷 刊本

右京山鄭友元撰皆已說不引舊解其各卦彖辭彖傳及爻辭爻傳俱連書而總釋之不分詮以上二家俱未詳時代釋其書當是明季人

周易廣義四卷 刊本

右明舉人吳中鄭敷教輯廣者以本義爲主取羣說而推廣之也

讀易辨疑四冊 刊本

右明舉人蜀中李開先撰所論多本來知德之說而參補以已見

易學象數論六卷 寫本

右國朝徵士餘姚黃宗羲撰謂易自有象數爲諸家異說紛紜而失其正因彙而論辨之內篇辨其倚附於易似是而非者外篇辨其顯背於易而自擬爲易者各分三卷

周易象詞十九卷

一名憂忠 學易論

寫本

右黃宗炎撰宗炎為宗羲弟此編乃其手稿其書不襲訓詁專本六書之義以言易於每卦每爻取字之象形會義等解詳繹而釋之嘗謂上古樸直如人名官名俱取類於物象若以鳥紀官及夔龍朱虎熊羆之屬是也易者取象於虫其色一時一變一日十二時改換十二色即今之析易也自其倏忽變更借為移易更易之用易易之為文象其一首四足之形周易卦次俱一反一正兩兩相對每卦六爻兩卦十二爻如析易之十二時一爻象

其一時在本卦者象日之六時在往來之卦者象夜之六時其持論皆此類雖似過奇實具有精理與日月為易之舊解別開生面易固無所不包也

周易尋門餘論二卷

寫本

右前人撰前編依經詮次此則隨筆雜述曰尋門者以乾坤為易之門見得門而入之難也陸嘉淑稱其直欲與洛閩大儒辨質於千載之上

圖學辨惑一卷

寫本

右前人撰以圖學出自陳圖南本養生馭氣之術托諸大易假借乾坤水火之名以自申其說與易

絕無所闕故力辨之

讀易大旨五卷 刊本

右 國朝容城孫奇逢著自云余至蕪門始學易
年老才盡偶據見之所及撮其體要以示門人子
弟原非逐句逐字作解故曰大旨有門人耿極為
之較訂

周易闡理四卷 寫本

右 國朝崑山戴虞臯撰專主詮理大約本蔡虛
齋林次崖陳紫溪郝京山諸家之說約而成文
應氏易解十七卷 刊本

右 國朝徵士仁和應撝謙撰其言曰天地之大
德莫善於中用中之宜莫善於時是書也以中明
易初曰易學大中既而懼其自以為是非所以求
教君子也乃更今名

易大象說錄二卷 首有雜錄一卷 刊本

右 國朝吳人舒鳧撰專說大象傳於每節後各
綴以贊頌贊係鳧作頌則其友施氏文相所為皆
四言韻語

易原二卷 刊本

右 國朝杭州趙振芳述歙縣徐在漢叅

易或十卷

刊本

右徐在漢述趙振芳叅兩人學易互相考質故二書分編而合刻前編論古本圖書及著卦律歷五行原委後編順經傳次第以爲說總序云二公通無方之神悟無體之易窮徹陰陽測微竒耦以故從而原之或之原之者探本乎無易之易先天之學也或之者發明乎有易之易後天之學也

易經辨疑六卷

刊本

右國朝江都張問達撰其言謂易以明人道聖人使人卽數以推理因占以利用未可專以占筮

視易蓋意宗王程者

易論二冊

寫本

右國朝諸生秀水徐善撰推究天人象數之原迥異章句家言

周易通十卷

刊本

周易辨二十四卷

前有易考
易論一卷

刊本

右國朝知縣吳門浦龍淵撰嚴沆曰易通以疏大義易辨以辨析微辭可以翼往聖而開來學吳偉業云潛夫學易務探其旨要於唐宋以來諸家之說有所鈎纂平心折衷無所偏主苟於大義有

垂心侃然辨正不爲兩可之辭雖素不習易者讀之未有不心目俱開也

周易義叅六卷

寫本

右 國朝貢生平湖于琳撰節錄本義於前而以已說叅附於後又名周易叅同經義考云未見

身易實義五卷

刊本

右 國朝商州知州嘉興沈廷勳輯自序畧云傳義二書易學之綱領也嗣後確守伊川者爲龜山楊氏平庵項氏確守建安者爲雙湖雲峯兩胡氏幼清吳氏雖間出己意要皆傳義之功臣若夫易

而禪者慈湖也易而史者誠齋也而考鏡古今得失俾易可見諸實用則吾於誠齋有取焉明儒論易薛文清爲最醇而蔡虛齋林次崖徐伯魯三家鼎立實爲易之正宗若夫來瞿塘具靈通妙解何玄子彙全易之巨觀以至呂涇野高忠憲劉念臺張湛虛之簡要唐凝庵錢啟新郝京山鄒四山李雪園之超異余爲是編間有採集則取其同於程朱者去其不同乎程朱者或程朱所互異則深研之以求其一是一是又或程朱所未及而其說有確當不可易者亦並甄焉名曰身易實義謂以心言易

未若以身體易之爲實以身體易又必以易見諸用之爲實也

喬氏易俟十八卷 刊本

右 國朝翰林院侍讀寶應喬萊撰首載宋濂歸有光河圖洛書辨說以下依經詮解間及史事

周易觀象十二卷 刊本

右 國朝大學士安溪李光地撰光地最深於易

康熙間

御纂周易折衷曾命爲總裁此其自著易義盛行於世

易圖明辨十卷 刊本

右 國朝監生德清胡渭撰援證經傳及諸家說以辨析圖義頗有據依

易經述一冊 刊本

右 國朝禮部尚書海寧陳詵撰每取二卦交易者並舉於全而總爲一說以發明之其序次與吳氏文臺之書相近惟彼專釋大象此則錄全卦之文稍有別耳

周易玩辭集解十卷 刊本

右 國朝翰林院編修海寧查慎行撰不列圖象專以推辭研理爲主所采多近人之說

易學叅說一冊 刊本

右 國朝海鹽馮昌臨撰分內外編內編於圖書推五行之原外編於干支究五行之用胡煦為之序

易經釋義四卷 刊本

右 國朝歸安沈昌期撰大旨多宗本義

易鏡二冊 寫本

右 國朝湖州戴天章撰專推象占以為卜筮之鏡其對卦伏卦互卦變卦反卦俱於每卦下一一標出

心易一冊 刊本

右 國朝杭州戴天恩撰為圖說凡二十有九自謂玩讀繫辭有所心得而作

易宮三十八卷 寫本

右 國朝布政使叅議歸安吳隆元撰上下篇各分十八宮或一卦自為一宮或兩卦合為一宮仍各標錯綜之卦以推行邵子天根月窟間來往三十六宮都是春之義

讀易管窺五卷 刊本

右前人撰前編逐卦分疏此則雜撰圖說前有考

畧十篇

易說六卷 刊本

右 國朝侍讀學士長洲惠士奇著條舉大義多引他經傳及漢儒之說以相辨証

索易臆說二卷 刊本

右 國朝江寧胡啟昆撰凡為說十有七為圖六皆以發明朱子之意

易疑三冊 刊本

右 國朝汾陽胡庭胡同合撰依經篇次細釋辭義而釋之

周易函書約注十八卷 刊本

右 國朝禮部侍郎光山胡煦撰按照所著函書原本體例繁富自序云凡九十九卷原圖八卷撮圖之大意解伏羲之易原卦三卷撮卦之大意解文王之易原爻三卷撮爻之大意解周公之易又取先儒論說著述集為原古三十六卷此五十卷列於前其解釋經文者共四十九卷合成九十九卷取大衍之數五十其用四十有九之義是為函書正集此外有約圖三卷篝燈約旨十卷孔朱辨異三卷易學須知三卷此十九卷在函書之外名

曰別集唯因別集先梓而正集未出故又自取正集後四十九卷之釋經文者節爲此編且云約之又約雖規模具備道理仍覺未暢則其全書必更有元元本本殫見洽聞之觀也

周易函書別集十九卷

刊本

右前人撰目見上所謂約圖三卷係原圖約一原卦約一原爻約一當卽取正集前十四卷而約之者

卜法詳考四冊

刊本

右前人撰專考龜卜源流卽所謂原古三十六卷

中之一門也

周易清解四冊

寫本

右國朝仁和江見龍撰以繫辭說卦傳冠篇首而每卦又以序卦傳分冠焉

經義管見一冊

刊本

右國朝南豐饒一辛撰列圖說七多發連山歸藏之義又周易統天旋卦賦一說卦傳論一納音五行論一古今本得失論一凡數則合題曰先甲堂經義初刻自序謂尚有他經著述云

陸堂易學十卷

前有發凡十八條圖說一卷

刊本

右 國朝翰林院檢討平湖陸奎勳撰謂商之歸藏本於神農夏之連山本於黃帝人知畫卦重卦由伏羲不知著數起黃帝乾坤八卦之名亦起黃帝又不知屯蒙五十六卦名增加於堯舜時其論雖多本舊說而時亦出新見者

周易集解增釋八十卷

寫本

右 國朝舉人秀水張仁浹輯是書體大而語詳其中集解居十之七自注疏以降所集不下二百家增釋居十之三皆仁浹之說而前人未發者謂易理廣大悉備故持論無所偏主歸於義理精純

惟艱深險怪者概弗錄諸錦曰宋房審權之義海久亡得此可以無恨以意揣之有過之無不及也

易學圖說會通八卷

刊本

右 國朝武進楊方達輯類聚宋元迄今諸家圖說而證明之凡分八門首日太極探原日圖書測微日卦畫明緼以立其本次日變互廣演日筮法考占以行其用又次日律呂指要外傳附証日雜識備叅以達其支其於圖學可謂該洽矣

讀易質疑二十卷

右 國朝新安汪燧撰所言詳於理而畧於數

周易述二十三卷 原缺八卷及二十一卷 刊本

右 國朝元和惠棟撰專事掇拾漢儒遺義以荀慈明虞仲翔為主參以鄭康成宋仲子干令升九家諸說并仿注疏之體融裁舊義以為注而大書於前復推行其說自為之疏而夾註於下仍依古本次第後附微言二卷

易經理輯一冊 刊本

右 國朝中書登封部煜著不列本文但每卦總為一解亦多沿舊說者

周易通義十四卷 寫本

右 國朝淳安方棗如撰詮釋義理時有心得

易貫十四卷 前有演易圖及易論二卷 刊本

右 國朝徵士婁縣張叙撰每卦以大象傳隸六畫下而以小象傳悉依乾卦例合編於六爻之後意在參酌古今本取其詞意相貫然此皆前代易家所已為而冒紊經之議者何以復蹈其轍其於經旨頗多發明說可存也

周易原始六卷 刊本

右 國朝御史錢塘范咸撰專釋上下二經不及十翼自謂仿馮厚齋易象通義徐至大易解之例

周易讀翼揆方十卷

刊本

右 國朝常熟孫夢逵著專釋十翼不及文周象爻謂世所稱小象傳乃爻傳非象傳當附象傳之後又論揲著左扚得一得三爲奇得四得二爲耦皆不苟同於舊解

周易蛾術七十四卷

寫本

右 國朝杭州倪濤輯以尚辭尚變尚象尚占列爲四綱取漢魏迄今百家之說條分而件繫之其本義全錄於尚占之下程傳則依李蒙齋節本列於尚辭之下又有附錄集說各條搜擇頗廣但今

本尚屬底稿所引諸說半係僅標某氏曰云云而未錄全文兼多竄易未定處不知其別有編成清本否也

易翼迷信十二卷

前有讀法一卷末附雜論

刊本

右 國朝天津王又樸撰專事研玩十翼而得其解陳祖范曰與費氏以繫辭文言解說上下經其意相近費氏無章句而此有成書足惠後學矣

易準四卷

刊本

右 國朝貢生嘉善曹庭棟撰詳於洛書而畧於河圖推數衍說凡五十一篇

易例舉要二卷 寫本

右 國朝侍講金匱吳鼎撰凡舉例一百四十八條上卷采諸舊解下卷皆已說

易經一說四冊 刊本

右 國朝王倣著遵朱子定本十二篇舊次意在參取眾家歸於一說使初學易讀易曉故名
易律通解八卷 寫本

右 國朝中書臨海沈光邦撰本易數以闡律呂之義頗見創解

周易彙解衷翼十五卷 寫本

右 國朝貢生靈武許體元撰係肄業成均時所作序稱其推闡傳意具有條理

易象援古一冊 刊本

右 國朝申爾宣著援古者援古人之事以解易每爻隸以一事乃其父舒坦命意而成

周易緯史二冊 寫本

右 國朝貢生仁和錢偲撰亦以史證經取相為經緯之義以上二家雖未如吳園誠齋諸儒之精切其說亦有可採

易傳辨異四卷 刊本

右 國朝舉人仁和翟均廉撰取漢唐舊說之在
注疏外者條而辨之

書類

尚書大傳三卷 刊本

右漢伏生所口授原書久佚今本乃近時仁和孫
之駿於羣籍中掇拾遺文臚句而編之者以隋唐
志舊作三卷故仍其數

東坡書傳二十卷 按宋志作十卷似誤 刊本

右宋蘓軾撰晁公武曰熙寧以後專用王氏之說
進退多士此書駁異其說爲多

夏柯山尚書解十六卷 寫本

右宋龍游夏僎輯陳振孫謂其集二孔王蘓陳林
程伊川張子韶及諸儒之說以便舉子按楊慎言
明初高廟科舉之詔猶云書主夏氏蔡氏兩傳近
則罕有習此編者矣原有時瀾序今本闕前三卷
尚書詳解五十卷 寫本

右宋奉議郎泉州泊幹安福陳經撰句梳字解詮
經最爲敷暢

尚書要義二十卷 前有序說一卷 二老閣寫本

右宋魏了翁撰說見易類

讀書取說六卷 寫本

右元金華許謙撰黃潛曰時有與蔡氏不合者要歸於是而已張樞曰所引傳疏諸家之說或采掇其詞而易置其次不必盡如舊者蓋皆有所裁定非徒隨文援引已也

書義矜式六卷 天一閣寫本

右元永州同知吉水王克耘撰張雲章曰宋熙寧四年始以經義策論試士經義之始其格律有破題接題小講謂之冒子冒子後入官題官題後有大講有餘意亦曰從講又有原經亦曰考經有結

尾承襲既久冗複可厭則不盡拘格律然大概有冒題原題講題結題此經義定式也克耘主張題意率本功令而又自為經義名曰矜式存此猶見當時體制

書義卓躍六卷 天一閣寫本

右明永豐陳雅言撰亦專為科舉設者

書傳會選六卷 刊本

右明洪武間詔徵天下儒士定正蔡傳令翰林學士劉三吾董其事書成賜名頒行天下詳見經義考

書傳通釋六卷

前有纂圖及讀書經法

刊本

右明山東按察副使永豐彭勗撰以書傳會選藏於學校閭巷未易得觀因摘取其說之切要者編附蔡傳以貽學者

尚書直指六卷

天一閣寫本

右明贈太子少保天台徐善述撰是書流傳之本俱不著姓氏朱彝尊考定謂係善述為東宮講官時所撰進

書經提要四卷

錢塘吳氏瓶花齋寫本

右明兵部主事黃巖章陔撰分天文地理圖書律

呂四門或為之圖或述其義以資考證其已具於蔡傳者不復出末有天順間門人任麒跋經義考云未見

書經旨畧一卷

瓶花齋寫本

右明刑部侍郎上海王大用撰分節說其大旨係大用撫蜀時作經義考云未見

尚書說要五卷

經義考作說疑

刊本

右呂柟撰說見易類

尚書疑義六卷

天一閣寫本

右明馬明衡撰爵里未詳自序云凡於所明而無

疑者從蔡氏其有所疑于心而不敢苟從者輒錄於篇

尚書譜五卷

經義考作續書譜四卷

錢塘汪氏開萬樓寫本

右明梅鶯撰鈞引羣籍以闢古文之偽其持論視吳草廬尤堅而辨近代閻若璩作尚書疏證頗宗其說書分二十九譜曰尚書全經目錄譜曰尚書序譜曰伏生墜經譜曰伏生得經二十九篇譜曰太史備載序篇譜曰安國私增序譜曰霸向增察譜曰古文相傳譜曰季長掇擊譜曰東晉古文二十五篇譜曰鄭冲受誣譜曰謚不與授受古文譜

曰帝王世紀譜曰元凱注左傳考譜曰古文根株譜曰根株削掘譜曰後人偽得篇首字譜曰穎達專門孔傳譜曰蔡沉異於曾子譜曰尚書纂言譜曰自述譜又每譜作一小引類爲一卷別附于後但按今本譜引止二十一日俟考

尚書考異三冊

天一閣寫本

右前人撰其說與前書相經緯前書將古今文篇次異同源委分列爲譜附以駁辨此則自舜典以下至周命逐篇逐節而摘辨之前有序并總論十五則末一卷係考正今文字義○按是編傳者絕

少經義考但載尚書考翼一卷與此不符卽闕氏
疏證內亦止引前書而不及此或者兩公俱未見
耳

尚書日記十六卷 刊本

書帷別記四卷 刊本

右明左都御史金壇王樵撰日記哀錄百家訓詁
討論折衷旁及歷象璣衡地理皆詳稽而得所依
據序謂有功于經不小其別記順文敷義猶屬舉
子業云

尚書砭蔡篇一卷 瓶花齋寫本

右明嘉善袁仁撰凡若干條書中之古卽其名而
可知沈道原序曰世有蔡卽有砭蔡者道無涯也
仁尚有鍼胡編

尚書釋二卷 刊本

右明鄧元錫撰但標四十九篇之目每篇銓釋數
條亦有併數篇而合詮之者

尚書疏衍四卷 問萬樓寫本

右明陳第撰自序云少時讀經不讀傳註口誦心
維得其義於深思者頗多近因宋元諸儒疑古文
僞作竊著辨論數篇復取古今註疏詳讀之意所

是者標之意未安者微釋之句讀未是者正之其
素得於深思者附著之間又發揮言外以俟後世
書經疑問十二卷 刊本

右明姚舜牧撰白序云書無可疑而所以說書者
或稍失其故余今所疑未嘗求異於傳注唯必求
其是終歸於無疑而已

尚書注考一卷

瓶花齋寫本

右明禮部員外郎平湖陳泰來撰於傳注中摘其
引經注經不照應者三條同字異解者三百二十
三條而論列之經義考云未見

尚書辨解十卷

刊本

右明郝敬撰亦專信今文者前八卷解今文二十
八篇後二卷係辨正古文

尚書傳翼四冊

刊本

右明建昌府推官平湖陸鍵撰翼云者意以翼蔡
也亦舉業家言

讀書畧記二冊

寫本

右明朱朝瑛撰前列古今文考一則古文辨二則
謂梅賾所奏上之庸卽孔氏所傳之五十八篇孔
氏之書特散亂于前復完整於後非鄭冲所得與

康成所注有二以辨考亭草廬不信古文之非其
從蔡傳處俱不詳釋

尚書揆一六卷 刊本

右明無錫鄒期楨撰蓋墨守蔡傳者經義考云未
見

尚書禘傳十五卷 經義考作十卷 刊本

右國朝吳江朱鶴齡撰不列全文但摘經之字
句而條釋之其言詳於辨證與蔡傳率多不合前
有考異一卷後附錄古文逸篇及雜說共一卷

今文尚書說三卷 後有古文尚書辨二篇 刊本

右國朝陸奎勳撰專釋今文時能補蔡氏漏義
若璣衡之爲斗杓江源出犁牛石肅州黑水迥異
梁州西藏三危實有其地洪範五事配五行當兼
相生相尅之序此類皆不襲舊解

尚書通義十四卷 寫本

右國朝方棗如撰畧舉大義按節詮之

心園書經知新八卷 刊本

右國朝貢生平湖郭兆奎撰於蔡傳中間有相
沿承誤者因爲辨析以發其義

虞書箋二卷 刊本

右明光祿卿歸安茅瑞徵撰專說典謨大義瑞徵當明末造而論唐虞之治蓋有匪風下泉之思焉

禹貢詳畧二卷

後附各圖

天一閣寫本

右明韓邦奇撰曰詳畧者畧舉蔡傳於前後詳引羣說以釋於後也係邦奇家塾課本

禹貢廣覽三卷

刊本

右明錢塘許晉臣撰於每州及導山導水下各附以圖而括以歌其間并詳近代輿制自題云借古約旨以廣今籌期于便讀亦廣見聞

禹貢圖說一卷

刊本

右明尚書海鹽鄭曉撰列圖於前而依經爲說於後內亦附及明代地制

禹貢山川郡邑考四卷

刊本

右明太僕卿無錫王鑑撰因古者山川郡邑加以今釋於沿革異同如指諸掌

禹貢滙疏十二卷

刊本

右明茅瑞徵撰所采頗廣自序云讀禹貢者詳九州之山川則可供聚米之畫習漕渠之岐路則可商飛輓之宜察東南之物力則當念杼軸之空考甸服之遺制則當興樹藝之利又謂底慎財賦一

語足蔽全書之旨蓋聖人逆知異日無藝之征故
先事而曲爲之防其言似有爲而發者

禹貢圖注一卷 刊本

右明舉人東鄉艾南英撰節蔡傳爲內注復參錄
諸說爲外註而以己意訂訛釋疑其間又別爲皇
明輿地圖論及河漕圖論附於尾

禹貢古今合注五卷 刊本

右明吏部考功郎華亭夏允彝撰前列四十六圖
於古今輿地分合及河渠原委頗詳自序云唯閩
粵滇黔未入九州不能贅附餘已包舉

禹貢長箋十卷 刊本

右 國朝朱鶴齡撰於傳註外兼考史志以證辨
之往往有補舊說所未備

禹貢椎指二十卷 前有畧例一卷圖一卷

右 國朝太學生德清胡渭撰渭深於地理嘗預
修一統志是編于康熙乙酉

南巡時奏進蒙

賜御書耆年篤學匾額徐秉義序云其書考正孔傳孔
疏宋元明諸家之說主以班固地里志參以山海
經水經注及郡縣志摘其謬誤辨其疑似使後世

讀經者瞭然心目之間至發明夏道所陳大義十餘尤足證明孔子無間之旨非但區區稽考沿革鈎覈異同而已

禹貢譜一冊 刊本

右 國朝翰林院編修金壇王澍撰先九州疆界貢道圖次導山導水圖次九州山川田賦圖次五服分合圖共列目四十末附釋月一篇

洪範考疑一卷 寫本

右明僉都御史金谿吳世忠撰分篇論次以闡九疇數義

洪範圖解二卷 刊本

右明韓邦奇撰以洛書爲數之原因取蔡九峯之八十一章衍爲圖解以究其用

範衍十卷 刊本

右明錢一本撰謂洛書洛所出之神龜也聖人則書叙疇以龜坼爲卜法後世著重而龜不傳太元皇極皆根據洛書而作朱子議其爲零星補湊因摹倣易象以龜求洛之舊契原數以爲兆綜九章以考古演爲繇辭編成韻語並自爲音釋詳解於下末卷則總論疇數之義焉

洪範正論五卷 刊本

右國朝胡涓撰謂洪範舊為曲說所害如漢儒五行傳專主災異以瞽史矯誣之說亂彝倫攸叙之經其害一又如劉歆言洛書本文具在洪範而宋儒乃創為白黑之點方圓之體九十之位則書也而變為圖矣且謂範之理可通於易劉牧因以九位為圖十位為書而蔡元定兩易其名其害二又洪範原無錯簡而宋儒任意收攬其害三涓因援据羣籍著為論以辨正之

詩類

穎濱詩解集傳二十卷 刊本

右宋學士眉山蘓轍撰詳于理亂得失晁公武曰其說以毛詩序為衛宏作非孔氏之舊止存其首一言餘皆刪去

詩總聞二十卷 寫本

右宋樞密院編修官汝陽王質撰陳振孫曰其書有聞音謂音韻聞訓謂字義聞章謂分段聞句謂句讀聞字謂字畫聞物謂鳥獸草木聞用謂凡器物聞跡謂凡在處山川土壤州縣鄉落之類聞事謂凡事類聞人謂凡人姓號共十聞每篇為總聞

又有聞風聞雅聞頌等。○朱彝尊曰自漢以來說詩率依小序莫之敢違廢序言詩實自王氏始

詩補傳三十卷前有詩篇目及明序篇二則寫本

右宋金華范處義撰自序云以詩序為據兼取諸家之長文義有闕補以六經史傳詁訓有闕補以說文又于篇目下自識云與舊譜不合者二十有五篇作詩之人可考其姓名者四十一篇正其有異說者四十有二篇

呂氏家塾讀詩記三十二卷刊本

右宋著作郎金華呂祖謙撰有朱子序魏了翁後

序自公劉以下六卷係門人續成陳振孫曰博採諸家存其名氏先列訓詁後陳文義剪裁貫穿如出一手已意有所發明則別出之詩學之詳未有逾于此也黃佐曰呂氏專主小序與集傳不同

童子問八卷經義考作二十卷刊本

右宋崇德輔廣撰廣為朱子弟子是書首列綱領及師友粹言其說多補朱傳之未備

叢桂毛詩集解三十卷原闕七卷寫本

右宋朝奉郎廬陵段昌武撰首載學詩總說分作詩之理寓詩之樂讀詩之法次載論詩總說分詩

之世詩之次詩之序詩之體詩之派以下依章詮
解大抵如東萊讀詩記例有淳祐八年從子廸功
郎段維清跋叢桂其堂名也

詩緝二十卷 寫本


右宋朝奉大夫邵武嚴粲撰亦以呂氏讀詩記為
主而集諸家說以發明之句析章括最得言外之
趣自來說詩家盛稱焉附有蒙齋袁甫手帖云黍
離中谷有蕓葛藟不用舊說獨能深得詩人優柔
之意其他一章一句時出新意再三翫味實獲我
心坦叔可與言詩也矣

詩義斷法五卷 天一閣寫本

右係元代科舉之學題曰建安日新書堂新刊謝
氏詩斷不著名

詩傳疏義會通二十卷 曝書亭藏刊本

右元處州學正樂平朱公遷撰明王逢輯錄何英
增釋英學於逢逢學於洪野谷洪為公遷門人蓋
授受有自也公遷謂朱傳以虛辭助字發明詩義
似輕而重似汎而切恐讀者忽焉故因輔氏廣之
說而更推之專在剖析傳文以達經旨至逢英等
又旁採他說接續附益焉



詩演義十四卷

天一閣寫本

右明梁寅撰自謂因朱子之傳演其義而申之經義考云未見

詩傳纂義一冊

瓶花齋寫本

右明鄞縣倪復撰不析解字句或篇或章隨意拈舉輒詮大義一二則經義考不載

讀詩私記二卷

刊本

右明濮陽李先芳撰宗序說而辨宋傳者經義考載有先芳毛詩考正注云未見不知卽此編否

毛詩說序六卷

刊本

右明呂柟撰說見易類

詩傳四冊

刊本

右明泰和郭子章校刊卽豐坊僞撰之子貢詩傳也以篆文書之而以楷字音於左方間爲說其義

詩序四冊

刊本

右前人校刊卽子夏小序也其言曰是序獨行於世家誦而戶習矣獲本與詩傳同篆故並刻以行蓋皆未免作僞而欺世者

詩經釋三卷

刊本

右明鄧元錫撰篇各爲說不列章句融取衆義而

畧仿小序文法爲之

毛詩古音考四卷 刊本

右明陳第撰專辨叶音之失列本證旁證兩門自序云本證者詩自相證也旁證者采之他書也二者俱無則宛轉以審其音參錯以諧其韻無非欲便于歌咏可長言嗟嘆而已

詩故十卷 刊本

右明朱謀埠撰黃汝亨序曰鬱儀說詩大都原本小序按文武周公以來春秋左國之事而次第其世考其習俗論其人而以意通之

傳詩嫡冢十六卷 刊本

言詩翼六卷 刊本

右明烏程凌濛初撰一題曰聖門傳詩嫡冢一題曰孔門兩弟子言詩翼皆以子貢傳與子夏序合編之并採毛鄭以下諸家參附焉蓋亦惑于豐坊之說者

詩逆六卷 刊本

右前人撰畧說大意近舉業家本

六家詩名物疏五十五卷 刊本

右明常熟馮復京撰本陸璣鄭樵二家疏畧更博

采而詳證之

詩經疑問十二卷 刊本

右明姚舜牧撰謂賦比興當通融取義謂所賦之有比有興非截然此爲比此爲賦此爲興也唯截分爲三乃致寢失其義又謂斷章取義凡詩皆可通用若作者之旨則有一定不易者未容稍有假借凡其所疑而辨證者皆此類

多識編七卷 刊本

右明安慶知府莆田林兆珂撰詳考名物間述作詩本旨郭喬泰序云可稱三百記事之珠

詩序解頤一冊 寫本

右明邵弁撰取小序及朱傳鑿柄處分條互解之亦無所偏主者

毛詩原解三十六卷 刊本

右明郝敬撰錢澄之曰京山說詩拘定序說序有難通輒爲委曲生解未免有以經就傳之弊而又立意與集傳相反不得其平至議論之精醇者足以發明朱傳不可廢也

詩經類考三十卷 刊本

右明知縣嘉善沈萬鈞撰沈思孝曰仲容仿王伯

厚詩考旁引博稽別門相附為類三十詩家巨觀
詩經輔傳四卷 刊本

右明禮部侍郎光山蔡毅中撰較析于毛序朱傳
之間每篇各為一說輔之者意在輔毛也經義考
作補傳屬誤蓋朱氏本未見云

詩經說通十三卷 刊本

右明國子監博士錢唐沈守正撰每篇總詮大義
於小序止采首句畧仿穎濱之意

詩傳闡二十四卷 刊本

右明副使武進鄒忠允撰用晉虞喜石摹本且誤

信偽子貢詩傳而反斥毛傳之非朱彝尊嘗切譏
之末附闡餘內外二篇

詩紀八冊 前有總論二卷 刊本

右明張次仲撰朱嘉徵曰待軒箋詩以小序為歸
凡托物引喻必究其情鳥獸草木必疏其義於字
句中察興亡治亂之機又於無言處深知作者之
意必根據經傳三禮正其典文復參觀羣史子集
定其指趣語質而意該足以垂後

讀詩畧記三冊 寫本

右明朱朝瑛撰謂觀亡詩六篇僅存首語則首語

作于未亡之前其下作于既亡之後子由獨取初
辭爲得之又謂集傳所得者國風十之五小雅十
之七大雅頌十之九前有論小序三則論詩樂二
則論詩用一則論僞詩傳一則

毛詩解八冊

刊本

右明提學僉事竟陵鍾惺撰所采自小序以下凡
十六家詩義

詩經圖史合考二十卷

刊本

右前人撰取詩中名物度數分章列義按事考辭
凡一千五百餘目蓋以資舉業家取材者按鍾氏

二種經義考俱不載

詩志二十六卷

刊本

右明錢塘范王孫輯采摭雖博而未免稍雜大約
明人之說居多

田間詩學六冊

刊本

右明錢澂之撰錢金甫曰飲光於詩擇衆說而調
和之頗具苦心

忘泉手學二冊

寫本

右書題曰環流堂石經魯詩正不著姓名亦依附
豐坊之僞本而成者自序云所以正毛本朱傳之

不正也其言毋乃誕矣經義考不載

詩經朱傳翼三十卷 刊本

右 國朝侍郎宛平孫承澤撰專尊朱而駁毛者自述云余取小序與朱子之說並列每篇之首定其是非通章大義業已了然又就集傳畧爲推衍以暢其旨欲學者觀之洞然於心而無疑

王 詩通義十二卷 刊本

右 國朝朱鶴齡撰自序云觀於六亡詩之序止系一言則後序多漢儒所益明矣觀毛公之傳宛邱不同序說則首句非毛公所爲又明矣又謂毛

鄭可黜序不可黜黜序則無以爲說詩之根柢唯楚茨信南山至采菽隰桑及抑戒等詩序說難信皆由古編淆亂錯簡所致此又深賴紫陽是正也

詩問一卷 寫本

右 國朝宣城吳肅公撰錯舉大義畧說之約三四十翻

詩經廣大全二十卷 刊本

右 國朝無錫王夢白陳張曾同輯韓茨序曰大全一書采羣經而或割裂片語未備本末引諸家論說而或未有折衷夫是以廣之也

詩識名解十五卷

刊本

右 國朝諸生錢唐姚炳撰以鳥獸草木分四部
采集各家專詮名物

詩經述一冊

刊本

右 國朝陳詵撰義參毛鄭詮其大旨不疏字句

詩說三卷

刊本

右 國朝庶吉士長洲惠周惕撰上卷總論其義
中下二卷摘舉篇什疏證指歸汪琬謂其博而不
蕪質而不俚。按周惕子士奇士奇子棟三世皆
以治經有聲

詩經測義四卷

一作十卷

刊本

右 國朝國子監丞安溪李鍾僑撰以夫子未嘗
刪詩特據所得編之而已若謂三千刪為三百則
春秋時君卿大夫所賦止在三百中其人皆在夫
子之前豈能預合聖人之意而取之風雅正變之
說亦難據楚茨以下瞻洛諸篇皆承平之作而列
之於變平王之孫列在二南編詩不必以正變為
低昂正變不必以世代為前後持論率有依據皆

臨川李紱云

詩蘊四冊

刊本

右 國朝舉人姜兆錫撰一名詩經集傳述蘊專
取朱傳與序說互異者精研博考以推究其蘊間
有辨及子貢詩傳申培詩說之處

陸堂詩學十二卷 刊本

右 國朝陸奎勳撰不取正變之說以楚茨十詩
斷爲成康盛世之音以斯干無羊考室考牧均歸
正雅淇澳楚邶緇衣蟋蟀均歸正風又謂編詩成
於史克之手因譏魯頌以頌僖季文子請于周而
得之孔子據是編以正詩猶春秋因魯史皆述而
不作之義前列讀詩總論四十五條

毛詩說二卷通論一卷 刊本

右 國朝詹事府贊善秀水諸錦撰自識云小序
採其首句從藥城例也隨篇不拘篇數從歐陽張
宛邱例也先左證而後發明毛鄭諸子而外有佳
說則採之有奧義則補之廣益也

風雅遺音二卷 刊本

右 國朝諸生鄞縣史榮撰專辨音釋多有補正
集傳處

毛詩訂韻五卷 刊本

右 國朝貢生餘姚謝起龍撰亦專考音韻意以

補宋吳棫之缺失

詩貫十四卷 刊本

右國朝張叙撰前有說詩本旨詩音表各一卷立義多參序說其遵朱者不復致詳於近時最取李安溪之詩所論韻則專宗顧寧人之詩本音云詩深二十八卷 刊本

右國朝巴陵許伯政撰博考旁証取古序及朱傳詳審而折其衷前有詩綱辨義十三則詩經叶音辨論八卷 刊本

右國朝諸生吳江劉維謙撰其論本顧氏炎武

音學五書之說為多

毛詩通義十四卷 寫本

右國朝方棨如撰專引經以證經每于章尾篇尾各系數語其文頗畧而却有會心

詩序廣義二十四卷 寫本

右國朝知縣象山姜炳章撰從程子之說以首篇為大序每篇首二語為古序其下係學者之辭為續序離一字使不相混與古序俱列于前博引羣書而以己意辨析焉

詩瀋二十卷 寫本

三
日
三
日
問
所

浙江採集遺書總錄

三

右 國朝柳州知府會稽范家相撰每篇為說一
二則或數則諸錦為之序謂其詮關雎鵲巢等二
十二篇有新貫而無宿壅

三家詩拾遺十卷 寫本

右前人撰擬拾齊魯韓三家詩之遺文軼義散見
於諸書者自謂本王氏應麟詩考更加蒐補刪正
而成前列古文考異古逸詩各一卷

浙江採集遺書總錄甲集終

丙
集
終

